




PRES RILIS

Tred Disput Traebunol i wantem letem pablik i save long olgeta wok, prosija mo proses, mo olgeta fi blong hem. Blong mekem i moa klia, Tred Disput Traebunol hemi olsem wan "Emploemen Traebunol" we i statem operesen blong hem blong sevem olgeta woka o employea we oli gat isu long wokples blong olgeta. Traebunol ia hemi wan infomol kot we i setap anda long Tred Disput Akt [CAP 162].

Wok blong mifala hemi blong lukluk long olgeta samting we i hapen we olgeta employea mo woka oli sendem i kam mo mifala i mekem wan desisen folem olgeta stret loa we i aplae long olgeta. Mifala i mekem desisen nomo long olgeta tred disput keis. Wan tred disput keis i mas bitwin wan woka mo employea blong hem o bitwin olgeta woka nomo. Olgeta tred disput hemi olgeta komplem o isu we i kamap tru long wan kontrak blong wok, teminesen, saspensen, isu blong disiplin, olgeta kondisen blong wok long wokples, membaship mo olgeta fasiliti blong olgeta memba blong tred yunion, mo sistem blong negosiesen. Hemia hemi samfala nomo long list, be i no finis long ples ia nomo.

Flow jat daon ia i soem prosija mo proses blong Traebunol:



Bambae woka o employea i save jusum wan man blong representem hem be man ia hemi no mas wan loea. Olgeta loea oli no alao. Olgeta rul blong pruf we i aplae long Suprim mo Majistret kot, oli no aplae long Traebunol ia.

Traebunol i gat olgeta fi blong woka o employea i pem. Fi blong wan kleim hemi VT 10,000, mo taem wan Defenden i gat wan kaonta-kleim, fi blong hem hemi VT 5,000. Hemia hemi wan fi we yu pem wantaem nomo.

From we Traebunol i givim smol taemfrem nomo, olgeta rul blong mifala oli alaowem mifala blong straekemaot keis sipos yu no kam long taem we oli talem mo bae oli save mekem wan desisen sipos wan pati i no stap.

Mifala i setap tru long Gavman blong Ripablik blong Vanuatu blong stretem tred disput blong yu insaed long wan period blong 3 manis mo yu no nid blong pem wan bigfala mane blong ligol kost.

Blong karem moa infomesen long saed ia, kontaktem ofis blong mifala long 33200 Voip 2585, mo yu save kam visitim Ofis blong mifala long Ministri blong Intenol Afea, hemia long Foma Ofis blong Lan Transpot, blong askem olgeta kwesten abaot traebunol ia.